

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. E hanga ana te tama i tētahi āhua ki te parāoa pokepoke. Kimihia te āhua i roto i te pukapuka *E Hanga Ana*.



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia mehemea he pai ki te ākonga te hanga āhua ki te parāoa pokepoke, ki te uku rānei.

Whiriwhiria te tukanga ka whāia ki te āta waihanga me te tūhono haere i ia wāhanga ina oti.

Kōrerotia te oranga ngākau ka rongohia i te kitenga atu o te mea oti.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e mārama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te mahi a te tamaiti?
2. He aha te rawa i whakamahia e ia?
3. Nā te aha i titiro ai te tamaiti ki te whakaata?
4. He aha ōu whakaaro mō te āhua o te mea oti?
5. Ki ōu whakaaro, he aha te kare ā-roto o te tamaiti i te otinga o te mea?

Ngā whakautu ki ngā whakapuaki māramatanga

1. He hanga āhua pērā i a ia.
2. He parāoa pokepoke.
3. Nā te mea i pīrangia ia ki te kite i tōna ake āhua kia āhei ai ki te whakatauiria.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

I He tautuhi i tētahi raupapatanga.

He whakatakinga ā-roto, he whakaharatau

I mua i te pānui i te pukapuka, matapakia te huarahi ka whāia pea e te tangata ki te waihanga i tōna ake āhua ki te parāoa pokepoke, ki te uku rānei.

Kia oti i te ākonga te pukapuka te pānui, matapakia te waihanga ā-raupapa i te āhua ki te whakaputa i te mea oti.

Whai whakaarohia ka pēhea te tauira rerenga tukurua “Ka taea e au te hanga ...” e whakaata ai i te waihangatanga ā-raupapatanga o te āhua.

Tirohia te āhua e waihanga taonga ai ngā kaitoi taonga uku me ngā kaiwhakairo.